

# Visoki predstavnik apeluje na kvalificirane kandidate da se prijave na vodeća mjesta u državnoj službi

Visoki predstavnik, Paddy Ashdown, u petak je apelovao na kvalificirane kandidate da se prijave za visoke pozicije u BiH državnoj službi koje se moraju popuniti. Visoki predstavnik je podržao ono što je ranije u toku dana izjavio direktor Agencije za državnu službu BiH, Jakob Finci. Gosp. Finci je rekao da proces popunjavanja devet vodećih pozicija u državnoj službi u Vijeću ministara BiH "predstavlja jedinstvenu mogućnost" zato što će pokazati da je državna služba BiH "otvorena za sve kvalificirane kandidate u okviru sistema koji je transparentan i zasnovan na stručnim kriterijima, bez obzira na politiku."

Visoki predstavnik je izrazio zabrinutost činjenicom da iako je ovih devet pozicija – sekretara ministarstava u Ministarstvu vanjskih poslova, Ministarstvu vanjske trgovine i ekonomskih odnosa, Ministarstvu sigurnosti, Ministarstvu civilnih poslova, komunikacija i transporta, Ministarstvu financija i Ministarstvu pravde, te generalnog sekretara Vijeća ministara i direktora Direkciju za evropske integracije – oglašeno prije dvije sedmice, do sada se prijavilo samo 15 kandidata.

"Nije jasno da li se potencijalni kandidati ne prijavljuju zato što nemaju informacija, ili zato što postoji vjerovanje da će se ova imenovanja u svakom slučaju vršiti prema stranačkoj pripadnosti," rekao je visoki predstavnik. On je istakao da "državna služba BiH neće biti mjesto za protekcionizam," te je naglasio da je garancija toga dokazani

“integritet, profesionalnost i efikasnost” Agencije za državnu službu BiH, koja je neovisna od političkih uticaja.

“Protekcionizam i politika u ovoj zemlji su uvijek išli pod ruku,” rekao je visoki predstavnik. “Ali sada se ukazala prava prilika da stručni ljudi, koji nemaju političke veze, dovedu do značajnih promjena u životima ljudi, i pokažu da je za državnu službu bitno posjedovati lični integritet i staviti interese građana ispred sopstvenih interesa.”